



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
**PANELI ZGJEDHOR PËR ANKESA DHE PARASHTRESA**  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZP.Anr.26/2026

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët Hidajete Gashi Alaj kryesuese, Kujtim Pasuli dhe Ramush Bardiqi anëtarë, duke vendosur lidhur me ankesën e Institutit Demokratik të Kosovës – KDI, me seli në Prishtinë, e paraqitur kundër subjektit politik Aleanca për Ardhmërinë e Kosovës AAK, me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Parakohshme për Kuvendin e Republikës së Kosovës, që do të mbahen më datë 07.06.2026, në seancën e panelit të mbajtur, më datë 06.06.2026, merr këtë:

#### V E N D I M

I. Pranohet e bazuar ankesa e Institutit Demokratik të Kosovës – KDI, ZP.Anr.26/2026 e datës 04.06.2026, ashtu që subjektit politik Aleanca për Ardhmërinë e Kosovës AAK, me seli në Prishtinë, për shkak të pjesëmarrjes së fëmijëve në fushatë zgjedhore, i shqiptohet dënimi më gjobë në lartësi prej 2.000 (dymijë euro) €.

II. Detyrohet subjekti politik Aleanca për Ardhmërinë e Kosovës AAK, me seli në Prishtinë, që gjobën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

#### A r s y e t i m

Me datë 04.06.2026, PZAP-i ka pranuar ankesën nga Instituti Demokratik i Kosovës – KDI parashtruar kundër subjektit politik Aleanca për Ardhmërinë e Kosovës AAK, në të cilën pretendon se me datë 03.06.2026, subjekti politik Aleanca për Ardhmërinë e Kosovës AAK, ka mbajtur një tubim publik me qytetarët e Deçanit në kuadër të fushatës zgjedhore për zgjedhjet e parakohshme parlamentare të datës 07.06.2026 dhe gjatë këtij tubimi, ankuesi pretendon se janë cenuar rregullat e fushatës zgjedhore dhe dizpozitat e LZP-së pasi që monitoruesit e KDI-së kanë raportuar se gjatë këtij tubimi janë hasur një numër i konsiderueshëm i fëmijëve nën moshën 15 vjeçare. Tutje parashtruesi i ankesës thekson se nga paraqitja e këtij tubimi publik edhe në media sociale konkretisht në faqen zyrtare të kandidatit për deputet nga subjekti politik i lartcekur, Ramush Haradinaj, shihen disa foto me të mitur dhe grupmosha të reja që duket se janë nën moshën 15 vjeçare. Prandaj, bazuar në këto veprime, parashtruesi i ankesës konsideron se është cenuar neni 5, par.3 i Rregullores Zgjedhore nr.07/2024 për fushatën zgjedhore, monitorimin e fushatës së zgjedhjeve dhe deklarimin

financiar ku në mënyrë shprehimore thuhet se: “Asnjë subjekt politik i certifikuar nuk mund të angazhojë persona nën moshën pesëmbëdhjetë (15) vjeç në fushatën zgjedhore. Pjesëmarrja e fëmijëve në fushatën zgjedhore, nuk mund të behët pa prezencën apo pëlqimin e prindërve”.

Si prova, parashtruesi i ankesës ka bashkangjitur: Fotografitë nga tubimi i AAK-së në Deçan:

1. <http://www.facebook.com/photo/?fbid=1557102532447756&set=pcb.1557103402447669>
2. <http://www.facebook.com/photo/?fbid=1557102532447756&set=pcb.1557103402447669>

Në përgjigje në ankesë nga subjekti politik Aleanca për Ardhmërinë e Kosovës, thekson se, nga fotografitë e bashkangjitura në ankesë shihet se në fokus nuk janë fëmijët por masa e përgjithshme e pjesëmarrësve në një tubim të hapur publik dhe se fotot paraqesin pamje të gjera të tubimit me qytetarë të moshave të ndryshme dhe nuk dëshmojnë ndonjë organizim, ekspozim apo përdorim të qëllimshëm të fëmijëve nga subjekti politik. Tutje në përgjigje, theksohet se, personat për të cilët pretendohet se janë fëmijë nën moshën 15 vjeçare shihen pranë prindërve apo familjarëve të tyre dhe se ngjarja është mbajtur gjatë ditës në hapësirë publike dhe është e natyrshme që prindërit pas marrjes se fëmijëve nga shkolla, të jenë ndalur për pak kohë në tubim dhe më pas të kenë vazhduar obligimet e tyre. Në kuptim të rregullave zgjedhore, “angazhim” i fëmijëve në fushatë duhet të kuptohet si përfshirje aktive në aktivitete zgjedhore mirëpo kjo nuk ka ndodhur në rastin konkret.

Me tutje ka theksuar se, prania rastësore e fëmijëve pranë prindërve në një tubim publik nuk përbën angazhim në fushatë zgjedhore dhe në rastin konkret nuk ka asnjë provë se fëmijët janë ftuar, organizuar, transportuar, instruktuar apo përdorur në çfarëdo formë nga subjekti politik për qëllime të fushatës pasi që fëmijët në foto nuk janë në fokus por masa e pjesëmarrësve në tërësi. Po ashtu, Aleanca për Ardhmërinë e Kosovës, pretendon se ankuesi nuk e ka vërtetuar moshën e personave që pretendon se janë nën 15 vjeç.

Andaj, duke u bazuar nga këto rrethana, subjekti politik Aleanca për Ardhmërinë e Kosovës, kërkon nga PZAP-i që ankesa të refuzohet si e pabazuar.

Paneli Zgjedhor për Ankesa dhe Parashtrësia, pasi që shqyrtoj dhe vlerësoi ankesën gjeti se:

Ankesa është e bazuar.

Paneli pas shqyrtimit dhe vlerësimit të ankesës vëren se nga fotografitë dhe linqet e ofruara si provë nga parashtruesi i ankesës, të cilat gjenden në shkresat e lëndëve, është vërtetuar se, e me datë 03.06.2026, subjekti politik Aleanca për Ardhmërinë e Kosovës, ka mbajtur një tubim publik me qytetarët e Deçanit në kuadër të fushatës zgjedhore për zgjedhjet e parakohshme parlamentare të datës 07.06.2026 dhe gjatë këtij tubimi shihet se kanë marrë pjesë disa fëmijë nën moshën 15 vjeçare, veprim ky që bie në kundërshtim me dispozitat ligjore të nenin 5, paragrafi 3 të Rregullores Zgjedhore nr.07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, me të cilën është përcaktuar se “Asnjë subjekt politik i certifikuar nuk mund të angazhojë persona nën moshën pesëmbëdhjetë (15) vjeç në fushatë zgjedhore.”

Paneli vlerëson se qëllimi i kësaj dispozite është mbrojtja e të miturve nga përfshirja në aktivitete të fushatës zgjedhore nga subjektet politike, dhe se në asnjë rrethanë nuk mund të marrin pjesë në aktivitete zgjedhore. Paneli, me rastin e vendosjes i shqyrtoi edhe pretendimet në përgjigje në ankesë të subjektit politik se nga fotografitë e bashkangjitura në ankesë shihet

se në fokus nuk janë fëmijët por masa e përgjithshme e pjesëmarrësve në një tubim të hapur publik dhe se fotot paraqesin pamje të gjera të tubimit me qytetarë të moshave të ndryshme dhe nuk dëshmojnë ndonjë organizim, ekspozim apo përdorim të qëllimshëm të fëmijëve nga subjekti politik. Por të njëjtin pretendim e vlerësoi si të pabazuar, për faktin se në momentin kur organizatori i aktivitetit iu ka mundësuar fëmijëve të marrin pjesë në kuadër të tubimit zgjedhor, pjesëmarrja e tyre konsiderohet përfshirje aktive në fushatë zgjedhore.

Në këtë kuptim, për Panelin këto veprime janë në kundërshtim me dispozitën e nenit 5, paragrafi 3 të Rregullores Zgjedhore Nr.07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar.

Paneli me rastin e vendosjes së lartësisë së dënimit më gjobë si në dispozitiv të këtij vendimi, ka marrë parasysh të gjitha rrethanat si në vijim: se përfshirja e fëmijëve në fushatë zgjedhore përbenë shkelje të drejtave të tyre, dhe se nuk është në interesin më të mirë të tyre që subjektet politike të angazhohen në fushatë zgjedhore, po ashtu paneli ka vlerësuar natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, dhe se subjekti politik Aleanca për Ardhmërinë e Kosovës AAK, ka qenë i njoftuar paraprakisht me obligimet dhe përgjegjësit gjatë procesit.

Mbi këtë bazë, duke u mbështetur në nenin 117.3 të LZP-së ku përcaktohet se “vendosja për ankesat nga PZAP-ja mbështetet në dëshmi të qarta dhe bindëse”, Paneli vlerësoj se pretendimet e subjektit ankues janë të bazuara, për faktin se nga veprimet e përshkruara në ankesë nga parashtuesi i ankesës paraqesin shkelje të dispozitave të lartcekura, të rregullës zgjedhore.

Nga arsyet e theksuara me lart, e në kuptim nenit 118 paragrafi 1, dhe nenit 120 paragrafi 1 nën paragrafi 1.3, të LZP-së, vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA  
ZP.Anr.26/2026, datë 06.06.2026

Kryesuese e Panelit,  
Hidajete Gashi Alaj



Këshillë Juridike: kundër këtij vendimi është e lejuar ankesa sipas nenit 118 paragrafi 4 të Ligjin Nr.08/L-228 për Zgjedhjet e Përgjithshme në Republikën e Kosovës, në Gjykatën Supreme të Kosovës, brenda 48 (dyzet e tetë) orëve nga momenti i marrjes-pranimit të këtij vendimi.